

欽
定
全
唐
文

欽定全唐文卷九十二目錄

昭宗

三

誅李師虔徐彥回勅

賜錢鏐奏取淮南勅

封錢鏐吳王勅

賜王建劄

平孫儒德音

賜錢鏐鐵券文

改元天復赦文

改元天祐赦文

欽定全唐文卷九十二

昭宗

三

誅李師虔徐彥回勅

朕臨御以來十有四載常慕好生之德固無樂殺之心昨季述等幽辱朕躬迫脅太子李師虔是逆賊親厚選來東內主持動息之間俾其偵伺每有須索皆不供承要紙筆則恐作詔書索錐刀則慮爲利器凌辱萬狀出入搜羅朕所御之衣晝服夜濯凝冽之際寒苦難勝嬪御公主衾裯皆闕緡錢則貫百不入繒帛則尺寸難求六輩同其主張

五人權其威勢若言罪狀翰墨難窮若許生全是爲貸法
宜並處斬

賜錢鏐奏取淮南勅

省所奏差節度副使錢傳瓘馬步都虞候傳球部領馬步
兵士樓船取二月十日進發各赴水陸攻取淮南卿自到
常潤界築牆一所指揮兵士請天軍往廬壽等州應援并
請詔示湖南荆襄速入洪鄂應副事具悉卿天贊忠貞神
扶正直萬里限江山之遠雖隔儀形一心推金石之堅益
明尊戴匡佐無渝於臣節操持遂峻於戎權威望彌高功

業居最欲海內之干戈漸戢憤淮南之梟獍未除每賴韜
鈴用舒宵旰凡觀陳奏愈念勤勞輟過庭而分總師徒離
所部而自施制畫況繼覽東南探報備聞卿水陸訓齊累
挫凶妖頻知勝捷征伐方推於重柄施張克建於殊庸將
寘昇平彌深睠倚但以未誅殘孽尚屬分兵只俟纔殪犬
戎便當併集貔武用爲應副庶叶機謀欽重獎稱再三無
已王延嗣回日已有詔旨必體予懷想宜知悉秋涼卿比
平安好遣書指多不及

封錢鏐吳王勅

朕嗣登大寶統理萬方有推誠待人之心少撥亂反正之略京畿叛亂宗廟震驚采周公宅洛之謀定商王遷殷之業當茲更始式表殊勲檢校太師守侍中兼中書令上柱國越王錢鏐一代偉人三朝元老定衰救亂素存忠義之心濟世經邦夙擅英雄之志鄉兵一起義聲四馳黃鉞初麾江表大定包茅時登乎天府版籍歲貢於有司日月塵昏牛女尋常拱北淮河鼎沸浙江日夜朝東用徙於越之封大畀勾踐之境爾其糾率侯服翼戴中朝選將練兵務農積粟進可參桓文之烈退可守吳越之區寧俾古人專

美前史於戲夫差遇顛沛之際罔替尊周仲謀方爭攘之時猶知有漢況爾名德殿此大邦必能宏濟艱難一匡天下予一人實有賴焉詩不云乎幹不庭方以佐戎辟爾尚勉旃可徒封吳王加食邑二千戶實封二百戶餘如故

賜王建劄

朕罹此多難播遷無常旦夕慄慄不能自保而況保天下事爲朕藩護有望於卿也

平孫儒德音

朕以冲眇嗣守丕圖思我高祖太宗創業之勞憲宗宣宗

理平之道何嘗不兢兢業業盱食宵衣上冀紹於耿光次
期臻於無事不懈一日於茲五年然近者藩翰未寧兵戈
屢動復以星辰乖忒運行斯愆每推愛物之誠深軫納隍
之念銷兵罷戰前古之佳猷宥過滌瑕當今之令典將敷

霈澤以遂羣倫淮南浙西宣州三道自孫儒結釁以來塗
炭益甚井邑多成灰燼里閭變以邱墟父母妻孥不得相
保田園第宅無以自安如聞州府急於征徭官吏切於課
績徵科闕罕有完膚禁繫狴犴更無生路苛縱如此何以
和元氣何以致太平須示優勤將闕富庶其淮南三道管

內州縣自大順二年以前諸色逋懸並宜放免自景福元年以後夏秋兩稅委長吏斟酌鄉縣戶人厚薄其有凋殘甚處別議矜放縱有稍可任持亦在薄其徵歛所冀逋逃漸復封境又安不惟減九重之焦勞抑且顯諸侯之風化又孫儒未平之日兵力方強側近專城固難支敵當不免與之來往時有供須蓋是脅從豈皆情願淮南節度使楊行密位冠侯藩之右名兼卿相之崇自當推厚下之規修睦隣之好無乘時以兼微弱無恃大而結仇讎應與孫儒蹤跡交涉者並宜免罪不在究尋各保封疆用蘇疲瘵易

稱作解史載泣辜庶將罪已之興亦冀從人之欲應京畿
及關輔內見禁囚徒除官典犯賊及殺人外並宜遞減勅
命分析限赦文到後三日踈放聞奏被褐懷玉固逸代之
奇才灌園鬻蔬亦超時之獨行將期致理豈可遺賢應天
下山林之中衡泌之際或懸頭刺股枕石漱流有志未言
無媒自達者委所在長吏速以名聞仍接借入京委中書
門下量才獎用其鄉閭父老八十以上及鰥寡孤獨并瘠
聾跛躄者委所在長吏量加優恤庶便棲遲於戲闕天子
也如手足之奉軀左右上下動須保持本或不寧亦難知

濟凡曰股肱宜體朕意宣布內外咸使聞知

賜錢鈔鐵券文

維乾寧四年歲次丁巳八月甲辰朔四日丁未皇帝若曰
咨爾鎮海鎮東等軍節度浙江東西等道觀察處置營田
招討等使兼兩浙鹽鐵制置發運等使開府儀同三司檢
校太尉兼中書令使持節潤越等州諸軍事兼潤越等州
刺史上柱國彭城郡王食邑五千戶食實封一百戶錢鏐
朕聞銘鄧騭之勲言垂漢典載孔悝之德事美魯經則知
褒德策勛古今一致頃者董昌僭偽爲昏鏡水狂謀惡貫

渫染齊人而爾披攘凶渠盪定江表忠以衛社稷惠以福
生靈其機也氛祲清其化也疲羸泰拯於粵於塗炭之上
師無私焉保餘杭成金湯之固政有經矣志獎王室績冠
侯藩溢於旂常流在丹素雖鍾繇刊五熟之釜竇憲勒燕
然之山未足顯功抑有異數是用錫其金版申以誓辭長
河有似帶之期泰華有如拳之日惟我念功之旨永將延
祚子孫使卿長襲寵榮克保富貴卿恕九死子孫三死或
犯常刑有司不得加責承我信誓往惟欽哉宜付史館頒
示天下

改元天復赦文

門下三階華宇暫移宸極之尊兩曜暗昏始表忠正之救
朕臨御寡德妖孽殊常蒙塵於便殿之中受制於逆臣之
手奪璽振指備肆侵凌挾刃搢胸幾罹酷毒閉關行僞則
公卿不在其謀懸榜見誣則黎庶不堪其詐害我骨肉殺
我嬪嬙悖惡滔天古今未有側陋嘗膽幽憂下宮皇穹降
悔禍之靈將相竭同心之德鳳翔節度使尚書令岐王茂
貞鎮於右輔首激剛腸有食失匕筋之驚有車及蒲胥之
怒關內之沈幾貫日剛納衛兵夷門之忠憤凌雲顯懲邸

吏三藩唱義四海協詞咸以密謀咨於上相於是禁軍之內三傑挺生上元假以良時高廟付其英斷月正元日新正吉辰質明而逆首梟懸中旦而凶渠剖裂共申匡復皆著功庸尋下詔書遞行賞典而茂貞旣平國難來覲天庭驅武旅而簞食爭迎駐皇都而秋毫不犯推殊功以薦同志留愛姪而董雄師繼筠能稟規程肅清輦轂人神洽慶華裔偕來亦旣十旬暨於初夏朕以脫於幽辱復正宸嚴重守寶圖不改舊物上媿於列聖下慙於兆人思宏蕩穢之恩仍革紀年之號庶明有罪皆在朕躬可大赦天下改

光化四年爲天復元年四月十五日昧爽已前大辟罪已下罪無輕重已發覺未發覺已結正未結正繫囚見徒常赦所不原者咸赦除之惟十惡五逆屠牛鑄錢合造毒藥謀故殺人及持仗行劫官典犯入已贓兼以踰濫身名冒優官秩及刑獄之內官吏用情致成冤濫不問有贓無贓並不在原免之限其劉季述王仲先王彥範薛齊偓同謀凶逆徒黨支屬追究未到者不在赦原之例其踈遠親屬素不通連衆知良善一切不問其左降官非與十一月五日交涉者並與量移元勅不在量移者亦與量移已經量

移者更與量移近處其情非靈政心不挾邪曾經兩度量
移者便與復資委中書門下酌量處分流人及降流者與
移近處如已收敘者量才敘用其左降官與流人已達貶
所者或至亡歿家口欲還及須歸葬者任從所便如孀幼
孤窮不能自濟者則委所在州府量與優恤發遣先有官
者各還本官上帝降靈將安丕祚中朝多難爰有誠臣登
好爵以報殊庸尋行令典錫嘉名而溥大慶用表洪勲靜
海軍節度使檢校太保平章事李繼昭嶺南西道節度使
檢校司徒平章事李繼誨寧遠軍節度使檢校司徒平章

事李彥弼並早參禁衛累著勲勤生知忠孝之源洞識君臣之義齊心瀝血果成復國之功左袒一呼遂定安劉之業叔姪繼先臣之烈彥弼稟大父之規據其大勲曠古難比宜加美稱以播無窮繼昭繼誨彥弼宜賜號扶傾濟難忠烈功臣各加實封一百戶六軍將士並賜號懷忠定難功臣應樓前左右神策及諸軍并鳳翔興德兩道立仗兵士等各委所司準例各與優賞以報勤勞宰臣司空崔允揮涕入朝含酸莅事防竊發於趨翔之際阻凶謀於譚議之間明大直若屈之機見反經合道之旨忠惟愛我奮不

顧家始則裂帛爲誓合契禁軍班列之臣忠良景附再安
宗社寧愧古賢雖已疇庸未爲報德宜賜回天興祚平難
功臣并加實封一百戶仍圖形凌煙閣功著定傾名高死
難永言風烈詎廢賞延故尚父子儀贈太師晟贈太尉秀
實贈太保瑊贈司徒杲卿贈太師真卿張巡許遠南霽雲
等家有主祭祀本房子孫中每家各與一子九品正員官
功格一時賞延後嗣旣配廟廷之享仍傳棨戟之門所以
勵仗節於千秋勸能臣於百代況新誅叛黨尤景英風武
德貞觀以來歷朝配享功臣及安金藏等宜委中書門下

各搜訪本房主祭子孫第其勲蔭量其人才各與敘用其
有進狀敘陳者委所司磨勘不得令有僭濫關畿不守先
帝西巡惟我輔臣首圖義計故收復京城西面行營諸軍
都統鄜夏節度使李思恭揚威北鄙決勝東橋佐鄭畋匡
復之謀倅岐陽統制之命提戈奮勇運策摧凶終成逐雀
之功顯就回鑾之計逮予初位尚洽嘉謀追矚崇勲宜膺
廟食其鄭畋已有別勅處分其思恭宜委中書門下特與
加贈仍配享僖宗皇帝廟廷故西面行營副都統涇原節
度使程宗楚故收復京城行營都統行軍司馬前朔方軍

節度使唐宏夫各持將節來佐台旌爭鋒而深入王城力
屈而銜冤寇壘莫覩歸元之貌空留不朽之勲言念竭忠
更隆茂典宜委中書門下並與追贈故南面招討使天平
軍節度使曹全政頃當強敵大振奇勲彎弧百戰於陣前
奪槊橫飛於馬上天時莫救壯氣空存宜從超等之褒用
勸百夫之特委中書門下優與嘉贈有客之詩前經具載
繼絕之義歷代所先言念於此豈忘舊典介公鄙公各與
一子九品正員官其二王三恪後各委有司準舊制修建
夫匡國之臣歿身無悔所祈後代雪彼沈冤太和七年故

宰相王涯已下二十七家並見陷逆名本蒙密旨遂令忠憤終被冤誣六十餘年幽枉無訴宜加恩需用慰泉扃宜並與洗雪各復官資如有子孫在人家隱藏者任自詣闕及州府投狀如非虛謬則與量才敘用故鎮海軍節度使李順節頃歲姦邪亂政慨慷不平偶洩藏謀遂罹橫禍仍遭誣搆被以罪名雖已行昭雪之文未降褒崇之命宜申緝禮以慰忠魂委中書門下優與追贈寢園之內充奉之間夙夜兢憂慮有遺闕其諸陵臺令委中書門下切加選用仍令所司給與優料段丁柏子不得別有役使切須優

料以時栽植其每年奉陵諸縣差配芟刈人夫不少殊不切用徒爲勞擾自今已後但每年芟薙之時委京兆府於本縣苗稅錢數內酌量功價支付陵令遣自和雇人夫委拜陵官常加點檢其下官宇舍委宗正卿京兆尹差官縣司同加點檢修飾務致尊嚴維城之重本枝之良敘敦是先渥恩當厚其宗室子孫自興德行在及光化元年所放出身及合許非時而參選者並委本司準舊例處分施行切令詳實不得致令踰濫仍令吏部切加磨勘修集之人辛勤可閱訪聞旅食動必逾年皆是吏曹及門下省因循

致茲留滯始於磨勘遠至進黃自冬涉春不得了絕自今
委中書門下切加提舉吏部一事以上並須準舊例程限
不得致有淹延自兵興以來吏道全消辦已者或衆恤人
者幾希遂使桑柘日摧荆榛歲茂將救黎元之命宜求撫
字之仁應兩京畿赤縣委中書門下切加選擇務在得人
諸州府縣令錄宜三選不得輕有注受切須當以人材畿
內編人久罹兵革雖連年豐稔而尚困艱貧念彼瘡痍宜
加惻隱應光化元年二年三年秋夏稅合輸納屬府州縣
及諸州斛斗草錢等所有逋懸並宜放免不得輒令官吏

尚有追徵其去年秋所欠即不在此限郊圻之內兵革以來言念凋殘固宜矜憫差徭人役須羅撓人在司局中之人又宜集事其京兆府每月合差赴飛龍掌閑雖是輪差諸縣不免長撓疲人宜令府司於苗稅錢內每月據所差人數目每人支錢送付飛龍司仰自和雇人夫充役途路所先通商是切開畿之地橫賦非宜致物價之益高自商徒之難濟令鹽鐵司及兩神策軍先有兩市雜稅並令停罷自今已後畿內軍鎮不得擅於要路及市井津渡妄置率稅雜物及牛馬猪羊之類其有違犯者有人糾告以枉

法贓論諸鎮縣節度及諸津渡訪聞每年興販百姓廣有
邀求致令滯停切令兩軍京兆府差人覺察痛斷都市之
內屋宇未多聞浮造之人常須更出地課將期招葺宜有
指揮應諸坊於公私地內浮造屋宇每月地課不得更有
收徵旬服生靈正當凋瘵太倉輸納務在均平儻容厚斂
之姦頗失憂人之意自今後太倉所納斛斗仰司農卿準
舊例主掌校量之際切在奉公不得先任吏人抑屈百姓
朝廷向來舊例止有榷酒喪亂以來遂行賣麴本自度支
營利近年兼借兩軍畿甸之人皆言不便所宜徇衆不廢

贍軍起今年五月已後京畿內任自製造私麴仰度支京兆府依舊例於酒店量戶大小逐月納權沽酒仍酌量隨月依前借軍諸司充諸色支用其兩軍元造麴制下後便勒逐斤減價六月三十日已前貨賣官麴其私麴不得更貨賣至七月一日已後不得更賣官麴之限爰自亂離殆將二紀關畿之內掠奪頗多遂令黔首之徒或被丹書之辱睠茲冤抑須杜茲訛舊格買賣奴婢皆須兩市署出公券仍經本縣長吏引檢正身謂之過賤及問父母見在處分明立文券并關牒太府寺兵戈以來條法廢壞良家血

屬流落他門既遠家鄉或遭典賣州府曾不尋勘豪猾得
恣欺凌自此準京兆府並依往例處分兩市立正印委所
司追納毀棄改給朱記行用其傳典賣奴婢如勘問本非
賤人見有骨肉證驗不虛其賣主并牙人等節級科決其
被抑壓之人便還於本家委御史臺切加察定天下州府
如有此色亦仰本道觀察防禦刺史各行條制務絕沈寃
堯懸諫鼓禹拜昌言在明哲之尚然實古今之所重況乍
祛蒙昧希致和平思謬諤而若療朝飢雖激訐而亦不加
罪諫官舉職須務濟時其文武常參官素懷術業者任上

封事極言得失必當召見親問所陳其有才識幽深事裨
時政者即職升擢或藏器俟時隱於巖谷者委文武朝官
所在州縣以行實聞薦舉衆目者實資於綱領總庶務者
必究乎本根將尋沿革之宜諒繫張弛之道其有事不稽
古官不易方欲正濫原須遵故實應有諸司法制廢墜多
時未復舊規者自今後宜委諸司各檢舉條錄聞奏委中
書門下詳酌處分漢徵極諫晁董陳理亂之端晉策能言
詵元貢闕遺之政乃登道廣請舉公平誠在得人以匡不
逮應天下諸色人中有賢良方正能直言極諫博通墳典

達於教化軍謀宏遠政術詳明者文武常參官及諸道節
度觀察等使具姓名聞薦至十一月到京朕當親臨策試
擇其可否施行駢背燕毛禮經所重即驗頌繫漢詔所矜
克存尚齒之規免致遺年之誚天下高年鰥寡八十已上
委所在長吏切加安恤其有不幸者量與葬送仍存撫孤
裔於戲文王姜里克建周邦大甲桐宮用興殷道朕不敢
忘六旬之辱公侯宜獎成萬代之功進忠賢以啟政途黜
邪佞以懲覆轍庶乎上下共保我高祖太宗之洪基

改元天祐赦文

乃睠中州便侯伯會朝之路爰逢百六順古今禳避之宜
況建鼎舊京我家二宅轅轅通其左郊鄩引其前周平王
之東遷更延姬姓漢光武之定業克茂劉宗肇葺新都祈
天永命皆因否運復啟昌期或西避於戎狄或載殲於妖
孽朕遭家不造布德弗明十載以來三罹播越亦屬災纏
秦雍叛起邠岐始幸石門以避衛兵之亂載遷華嶽仍驚
畿邑之侵憂危則矢及車輿凌脅則火延宮廟迨至逆連
宦豎構結姦凶致劉季述幽朕於下宮韓全誨劫予於右
輔莫匪兵圍內殿焰亘九重皆思假武以容身唯效指鹿

而威衆矯宣天憲欺蔑外藩行書詔以任情欲忠良而獲
罪雖羣方嶽牧協力扶持拘戎律於阻修報朝恩而隔越
獨有副元帥梁王全忠以兼鎮近輔總兵四藩遠赴岐陽
躬迎大駕辛勤百戰盡剿凶渠營野三年竟迴鑿輅咸鎬
載新其宮闕讓珪絕類於閭徒方崇再造之功以正中興
之運而又邠延結釁岐蜀連兵上負國恩下隳隣好焚宮
烈火更延熬於親隣却駕凶鋒復近侵於禁苑抑又太乙
游處併集六宮罰星熒惑久躔東井元象荐災於秦分地
形無過於雒師爰有一二蓋臣洎四方同志竭心王室共

誓嘉謀魏鎮定燕航大河而畢至陳徐潞蔡輦巨軸以偕
來披荆棘而立朝廷剡煨燼而光輪奐左郊兆而右社稷
肅爾崇嚴前廣殿而後重廊藹然華邃公卿僉議龜筮叶
從甲子今年孟夏初吉備法駕而離陝分列百官而幸維
郊都此殷繁良多嘉慰謝罪太廟憂惕驚懷登御端門軫
惻興感蓋以一人寡祐而萬姓靡寧工役艱疲忠良盡瘁
克建再遷之業冀延八百之基宜覃渙汗之恩克俟雍熙
之慶滌瑕蕩垢咸與維新可大赦天下改天復四年爲天
祐元年應依天祐元年閏四月十一日昧爽已前所犯罪

輕重已發覺未發覺已結正未結正見繫囚徒常赦所不
原者咸赦除之唯十惡五逆故殺人命合造毒藥持仗行
劫官典犯贓不在此限長流人罪無輕重一切放免左降
官與量移已經量移者更與量移經兩度量移者便與復
資縱元勅云逢恩赦不在量移者今亦與洗滌一例施行
如所在亡歿者便許歸葬朝貶官前資官及父母喪服闋
委中書門下先與敘用存樹勲庸歿留義烈宜錫子孫之
澤永流苗裔之恩庶邀英風以光壯魄武德以來立功效
節著在史策兼與搜訪子孫繼嗣量才敘用其近年隨全

忠鳳翔迎駕及青州討伐身歿王事者委全忠錄奏如未經追贈者與追贈已與追贈者更與加贈有子及妻在者優與存恤用表始終土木之工辛勤斯極樸斲既刈於斤斧結構悉冒於梯登轉石如生翦茨就坦或簡差於軍伍或徵役於他州下不告勞吏皆戮力言念於此先布爾恩應修都邑工匠人夫軍將節級軍人百姓等共賜錢一十萬貫以見在東都諸道上供物充委全忠分給其軍將仍委具名銜聞奏量材酬獎天旋日轉取象神明雷震電昇蓋資儀衛稱警前導清蹕至都楯帳赫奕於行宮旗纛披

靡於長路建茲班仗整肅無虧稟教揚威宜膺賞賚應自
陝州執掌儀仗隨駕馬軍及樓下立仗將士等共賜錢五
萬貫以見在東都錢充委全忠分給文修紀律武靜難氛
當於建國之辰體爾榮家之志大頒蠟印用慰泉扃應內
外文武常參官已上及節度觀察防禦刺史並與追贈追
封先已有者更加封贈務表哀榮漢宗蕭何周師呂望不
有人傑孰拯屯危況茲定鼎之方甫爾建侯之所嘉其勲
德一何巍巍迴天再造竭忠守正功臣守太尉中書令宣
武護國宣義天平等軍節度使諸道兵馬副元帥知府事

判六軍諸衛事梁王全忠四溟偉量五嶽奇姿挺將相之
兼才行公侯之全孝迎鑿岐邑忠貫於神祇作輔鳳池智
周於今昔副予愛子仍董衛兵既久而稱芳見多多而
益辦一昨痛思國難首建良謀追周官卜雒之規述殷后
遷都之策故得會盟咸萃遐邇遄臻分功盡稟於指蹤表
位悉歸於心匠躬勤巡撫頻散財糧荷畚鍤以駢羅執斧
斤而翕習千門萬戶化雒宅之新宮三署六軍踰西京之
舊制人謀既叶天祐相扶俾我眇躬享茲垂拱策勲之典
別降麻制處分睠惟良帥活濟疲人果因富庶之基遂創

繕修之事表得人之斯理見有開而必先叶節元勲賚爾
同德東都留守祐國軍節度使檢校太師兼中書令河南
尹張全義保釐東雒二十餘年惠行而藹若春和令簡而
煦猶愛日珪璋特達桃李無言勸勤靡憚於身先敬善每
聞於國事宮商迭應杞梓相扶誅茅棘爲平坦之田變黍
離爲垣墉之峻役均甸服莫不子來夙駕而勤陝宮戴星
而營新殿講論勲績實爲亞焉報功之典別降麻制處分
國有大慶先及輔臣僉同旣賴於經綸夙夜頗勤於扈從
道途久次已聞啟沃之言朝闈方新更佇謀猷之力裴樞

等宜與進改別降麻制處分凡營都邑宗廟爲先非託良
臣孰能盡禮魏博節度使羅紹威經文緯武本孝資忠奉
三百年之威靈構十二堂之棟宇將親禘祫式畏崇嚴獲
展烝嘗預懷悽感天屬所蔭百代無踈矧我居新尤宜共
樂鎮冀節度使王鎔代延勲戚躬尚禮儀採常嶽之瓌椽
製棠華之廣第內列雍和之殿外開朱戟之扉用宏友愛
之風切慰睦親之思行鑿所駐供億攸難淹留將及於十
旬忠敬備傾其任土陝州節度使朱謙驛驅得路雕鷲逢
秋識將臣事君之儀導季父扶天之業仲春迎蹕西自於

閔鄉閏夏撰行東及於都界饋獻有豐於國制贍濟盡費
其家財卓立茂功宜膺異賞並別降麻制處分伏思明祖
之幸蜀都旋闕則恩施父老代祖之駐陝服迴鑾乃澤布
州閭德祖之巡梁州沖人之省華郡前則以興元列號後
則以興德標名矧乃甘棠抑惟右鎮俾新稱謂用慰藩方
宜追列聖之舊文兼循往年之近事宜改陝州爲興唐府
長史爲尹其所置官屬一準興元等例其將士等仍賜錢
三萬貫充優賞委所司逐便支給其潞州節度使丁會左
創文昌之省右新執憲之臺軍令嚴明興功迅速河陽節

度使張漢瑜宵程來覲兩舍不歸問彼春芳躬巡板築宮
庭馳鞠蓋閱驍才王處直遠罄規模備周場殿則有留陽
上相獻嵐谷之瓊材浙右元侯貢夏金之三品咸鎬緝繕
完之政荆襄開水陸之途豫章傾尊獎之心鄂渚竭忠貞
之懇潭桂守弭兵之略甌閩勤納貢之儀夏川孤立以安
邊朗陵兩州而效惻嶺表則番禺盡節海濱則青社自新
交馳陝澗之途並集澗瀍之闕嗟朕菲德何以致茲履薄
臨深莫申兢畏其諸道藩鎮牧守並委中書門下等其功
績進改處分禮儀使御營使各與進階執政乖方自罹衆

怒任使斯久忍忘舊恩故太子少傅崔允頊者朕在下宮
實輸忠節後全忠迎奉又罄禪謀不慎滿盈遽投於覆餗
今逢曠蕩興念於遺簪宜復本官階爵準天復四年正月
十四日已前從別勅處分夫爲下不二爲上不疑適當樹
鷄之辰將陳刑馬之誓咨爾藩岳敬聽朕言敦好睦隣諸
侯大義興兵動衆有土深災居人不保家室戰士身膏草
野爲人上者何所忍焉恃安者危逞欲者敗齊桓葵邱之
會但整衣裳晉文踐土之盟唯論職貢古賢雖遠仰止何
殊如有隣境自相攻討情理不容者先具奏聞朝廷爲平

其事理若有不用王命擅舉兵者委諸道共伐之含垢匿瑕國君所尚雷驚雨洗域內斯同乾坤盡欲其包容日月不私於照耀其有負江山之固納奸諂之謀雖恣猖狂或思改革禹誅後至予不忍爲舜用舞干竊所景慕如其執迷不悟長惡不悛國有刑章非朕能捨禍福二事審自擇焉李茂貞楊崇本頃叨闡孽罪已貫盈近抑強鋒謂知大德喘息纔緩翻覆如初嘗懷梟獍之心欲恣豺狼之噬劫脅羣下安忍不臣此而可容是隳王法即宜經略進討然念彼一境獨困凶殘罪止二人之身其下並許立功自贖

俟續處分人倫之間天性或異特起因心之孝獨堅匪石
之貞方遷國於土中貴廣教於區內應天下有孝子順孫
義夫節婦事績彰顯爲衆所知者仰所在長吏標錄聞奏
當與旌表門閭將安疲瘵須委循良共理者太守之能親
人者縣宰之任戈鋌稍戢政術爲先刺史縣令有勸課農
桑招復戶口一倍已上於前者委本道觀察使條件奏聞
當加進陟如貪墮不理害及於人者速使停替務加葺養
稱朕意焉思拯艱難實資材幹尚慮非常之士猶懷自進
之嫌苟或失人焉能致理倘有懷才抱德隱遁山林武藝

絕倫湮沈卑賤者仰所在處長吏察訪奏薦如得才實當
待以不次之位於戲肆嘗閭闔即安宮闈雖九廟凡筵已
開於新室而諸陵松柏遙隔於舊都將務又寧難申顧慕
文武百辟執事具僚從我千里而來竭爾一心莅政恩覃
既往效責從新方當開國之初必舉慢官之罰分茅邦國
外相大官愍茲多難之時無爽勤王之業協告元輔毗予
一人礪山帶河敬守漢高之誓卜年與代希同穆滿之言
永安新京無忝我高祖太宗之景命赦書日行五百里布
告天下咸使聞知

欽定全唐文卷九十三目錄

哀帝一

授楊涉平章事制

授裴樞崔遠左右僕射制

貶陸扆王溥制

責授柳璨密州司戶制

允羣臣請停親送山陵詔

許宰臣已下遊宴詔

修省詔

改上清宮爲太清宮詔

注擬專委三銓詔

常朝改東上閣門詔

改雒都諸門與西京門同名者詔

答河南尹張全義進嘉禾合穗詔

百官逐月支半俸詔

允吏部請諸道申送員闕詔

新除官不得停住詔

允朱全忠請注擬準舊式處分詔

罷柳遜詔

貶李延古衛尉寺主簿詔

答中書門下表賀朱全忠進白兔詔

復排廊飡詔

誅孫祕詔

禪位梁王詔

發內庫銀充文武常參官救接勅

停嘉會節勅

封屈原勅

誅李彥威等勅

皇太后冊禮改期勅

親送山陵勅

欽定全唐文卷九十三

哀帝

帝諱祝昭宗第九子景福元年生乾寧四年封輝王名祚
天復三年二月拜開府儀同三司充諸道兵馬元帥天祐
元年八月朱全忠矯昭宗遺詔立爲皇太子改今名尋即
位四年三月禪位於梁梁奉帝爲濟陰王遷於曹州開平
二年二月遇害在位四年年十七諡曰哀後唐明宗追諡
曰昭宣光烈孝皇帝

授楊涉平章事制

門下持鈞軸以變陰陽是資至德掌地征而富邦國必仗
通才難虛作礪之求式叶爲霖之望金紫光祿大夫守尚
書吏部侍郎上柱國宏農縣開國伯食邑七百戶楊涉代
襲軒裳業通墳典踐履華胄周旋大寮陳太邱雅尚清貧
葛稚川不貪榮祿綽有休問喧在羣言往典貢闈則文行
兼採近司銓管則清濁咸分至必可稱動皆垂範朕嗣守
丕祚虔思小康是用授以鈞衡委之征賦爾其克申蘊蓄
用副旁求使干戈速偃於四郊玉帛繼歸於內帑仍司仙
殿更重化源勉輔沖人臻於理道可尚書吏部侍郎同中

書門下平章事充集賢殿大學士判戶部事散官勲封並如故

授裴樞崔遠左右僕射制

門下入則秉鈞衡而凝庶政出則正冠冕以長百寮式資夙舊之臣咸謂重難之地銀青光祿大夫守尚書右僕射兼門下侍郎同中書門下平章事充太清宮使宏文館大學士延資庫使諸道鹽鐵轉運等使上柱國河東郡開國侯食邑一千戶裴樞周事四朝慎守三紀再持國柄屢竭訐謨光祿大夫門下侍郎兼兵部尚書同中書門下平章

事監修國史上柱國博陵郡開國公食邑二千戶崔遠語
默有程得喪無擾中樞游履盡瘁克彰俱宣夙夜之勤備
罄匡扶之業是用均其勞逸顯爾便蕃變調暫輟於劇權
師長並資於碩望無虧懿效式使當仁或增疏爵之榮更
表優賢之禮樞可光祿大夫守尚書左僕射仍進封開國
公加食邑一千戶勲如故遠可守尚書右僕射散官勲封
並如故

貶陸扆王溥制

朕以涼德獲嗣丕圖將宏至公以凝庶績憲章不濫賞罰

惟宜俾恢理政之風用正紀綱之典其有常居宰輔但協
茲邪苟玉石之未分則稂莠而將茂須行黜責用致澄清
吏部尚書陸扆早以文儒亟揚華顯自先皇帝議征峻隴
而扆確有救論果犯雷霆旋經遷貶其後託茂貞之勢援
憑閹監之梯媒尋復舊官再升重位惟知周比寧務變和
邇來多難罔不由此工部尚書王溥亦茂貞奧主崔允門
人驟厯禁闈俄塵袞職但恣詭隨之志曾無匪懈之稱崔
允旣寘嚴誅而溥獨居清列况朕恭承大寶思拯彝倫非
爲洗垢求瑕但冀懲惡勸善兼宜斥於外掾不可容在中

臺尚謂寬恩勉當省過展可濮州司戶參軍溥可淄州司戶參軍

責授柳璨密州司戶制

明罰飭法固有彝章懲惡除邪用摠衆怒責授官登州刺史柳璨素矜儉巧每務回邪幸以庸才驟持重柄曾無微效顯負明恩詭譎多端包藏莫測但結連於凶險獨傾陷於賢良罪既貫盈理宜竄殛尚處一麾之獨任虧三尺之常刑將塞羣言須行重典自貽顛覆無或怨尤可貶密州司戶參軍

允羣臣請停親送山陵詔

朕以痛深創鉅園陵有期冀當復土之辰以慰終天之報而公卿大臣敷陳典故援引今古以爲一日萬幾不可斯須而曠旣執禮而愈切難順情而有違深抑荼蓼之哀懷俯徇股肱之讜議爰因晨省已啟慈顏倍極哀摧勉從來請

許宰臣已下遊宴詔

朕以宰臣已下常拘官局罕獲歡娛今膏澤不愆豐年有望將臻上瑞宜示優恩及此芳辰當茲麗景稍令暇逸俾

務遊從宜令自今月十二日至十六日各令逐便選勝遊宴

修省詔

朕以宿麥未登時陽久亢慮闕粢盛之備軫予宵旰之憂所宜避正位於宸居減珍羞於常膳諒惟眇質深合罪躬庶期昭感之祥以致滂沱之澤今月八日已後不坐正殿及減常膳

改上清宮爲太清宮詔

元元皇帝肇基聖緒敷佑神孫璿派靈長共乾坤而莫極

瑤圖堅固與日月而無窮是以我朝追崇奕葉昭祀禮因
尊祖爰陳恭敬之文事惟求真且異虛無之旨比者當如
九廟別置一宮東遷以來欲修奉而未暇北觀之內遂薦
享以從宜每備粢盛靡稽古實祝史正辭而追遠雖屬猶
龍宰臣肅拜於當陽如求罔象徒陳玉笋莫對瓊彝瓌練
達舊章振舉重職爰思改作頗謂協宜庶不愆而不忘致
來顧而來享又尋元圃如得瀨鄉古殿闕清喬木陰翳可
以仰規紫府便號清宮捨短從長斯爲智士尋源正始實
賴賢臣合議允俞殊可嘉獎

注擬專委三銓詔

設官分職各有司存銓衡既任於吏曹除授寧煩於宰執但所司注擬申到中書過驗酌量苟或差舛難可盡定近年除授其徒實繁占選部之闕員擇切當之優便遂使三銓注擬之間皆曠職務且以宰臣所任提舉百辟唯務公平將致無私克臻有道應天下州府令錄並委吏部三銓注擬中書門下自天祐二年四月十九日後並不除授或有諸道薦奏量留據狀詳度可否施行庶幾各司其局免致繁隳宰相提綱永存事體

常朝改東上閣門詔

東上西上二閣門制置各別至於常事則以東上居先或
大忌進名遂用西閣爲便同於禮式何表區分頃緣閣監
擅權乃以陰陽取位不思南面但啟西門邇來相承未議
更改詳其稱謂似爽規儀自五月一日已後常朝取東上
閣門或遇忌日奉慰即開西上閣門永爲定制

改雒都諸門與西京門同名者詔

法駕遷都之日雒京再建之初慮懷土有類於新豐惟更
門以合於舊制今則妖星旣出於雍分高閣難倣於秦餘

宜復別門之名以壯卜年之永是用分疆畫界實顯驗於
否臧東雒西京靡互參於制度其京都見在門同西京門
名者並宜改復雒京舊門名

答河南尹張全義進嘉禾合穗詔

多稼如雲已稱大稔異畝同穎益表殊祥張全義尹正邦
畿從容廊廟動必垂於惠化靜每著於變調佐時之略彌
彰阜俗之風益顯爰昭元貺可卜豐年訓農遐掩於衛文
獻瑞迴同於唐叔載觀禎異尤切歎嘉仍付史館

百官逐月支半俸詔

所有百官俸料實繫國用盈虛昨自去冬領給全俸及支遣之後公帑不充蓋道途初通綱運未集徒挂憂勤之念尚牽經費之資若不議均分則必至懸絕量其物用須有指揮其百官逐月料錢宜令左藏庫自今年正月支半俸允吏部請諸道申送員闕詔

比者吏部注官只憑格式送闕近以諸州不申闕解且從權指揮選人指射之時既不詳審銓司注唱之際遂使交加頗屬弊訛頻起論訟所司釐革合議允從

新除官不得停住詔

朝廷命官量能授職中書奏擬旋已施行掄才既備於班
員立政兼伸於沈滯況遷都之後制度聿興新授官者翔
於外藩不議赴闕前資任者蟄於列屏自謂安時矧爾代
受國恩身榮朝請養高保性既不能解印挂冠論級嗜名
又不能擘肌分理況新羅渤海外國遠戎奔程已至於新
都入貢不虧於舊典復於朝士有愧夷人既除官者尚不
歸班則前任者良難戀主宜令諸道節度觀察防禦刺史
等如部內有新除朝官前資朝官勅到後三日內發遣赴
闕仍差人監送所在州縣不得停住苟或稽違必議貶黜

付所司

允朱全忠請注擬準舊式處分詔

應合赴吏部常調選人等三銓公事素有條流近年多不
公平遂致授任重疊既聞爭競須暫停留今者元帥梁王
動靜推公周旋陳理或慮選人羈旅特請準式施行兼緣
已及深冬所司未有起請若或稽滯必緩程期功在考詳
務令精當今年冬常調選人宜委三銓並準舊例處分如
或踰濫輒違格文罪在官曹非止猾吏其四鎮管內官員
須候本道申闕到省方可注擬

罷柳遜詔

遜嘗爲張濬租庸判官又王溥監修日奏充判官授工部侍郎又與趙崇裴贄爲刎頸之交昨裴樞等得罪之時合當連坐尚矜暮齒且俾懸車可本官致仕

貶李延古衛尉寺主簿詔

司勳員外郎李延古世荷國恩兩葉相位幸從筮仕累忝寵榮多厯歲時不趨班列而自遷都卜洛紀律載張去明庭而非遙處別墅而無懼罔思報效姑務便安爲臣之節如斯貽厥之謀何在須加懲責以肅朝倫九寺勾稽尚謂

寬典可責授衛尉寺主簿

答中書門下表賀朱全忠進白兔詔

上天眷祐靈龜效珍道既協於坤慈祥乃彰於月窟雪霜
是比較晶可觀全忠道貫神明功高鼎鼐果因嘉瑞歸善
天庭俾頒示於有司冀流光於不朽再三嘉翫歎注良深

復排廊飡詔

百寮入朝兩廊賜食遷都之後所司闕供元帥梁王欲整
大綱復行故事罔思勞費悉自再圖是使端簡在廷咸思
感悅裁冠就列益任優隆備覩寵規彌增欽歎宜賜詔獎

飭仍付所司

誅孫祕詔

祕是故崖州司戶參軍孫乘親弟其兄旣處極典其弟難貸餘生宜除名配流愛州充長流百姓仍委御史臺差人所在賜自盡

禪位梁王詔

宰臣文武百辟藩岳庶尹明聽朕言夫大寶之尊神器之重儻非德充宇宙功濟黔黎著重華納麓之功彰文命導川之績允熙帝載克代天工則何以統御萬邦照臨八極

元帥梁王龍顏瑞質玉理奇文以英謀睿武定寰瀛以厚
澤深仁撫華夏神功至德絕後光前緹油罕紀其鴻勳謳
誦顯歸於至化二十年之功業億兆衆之推崇邇無異言
遠無異望朕惟王聖德光被八紘宜順元穹膺茲寶命況
天文符瑞雜沓宣明虞夏昌期顯於圖籙萬幾不可以久
曠天命不可以久違神祇叶心歸於有德朕敬以天下傳
禪聖君退居舊藩以備三恪今勅宰臣張文蔚楊涉等率
文武百僚備法駕奉迎梁朝勉勵肅恭尊戴明主沖人釋
茲重負永爲虞賓獲奉新朝慶泰兼極中外列辟宜體朕

懷

發內庫銀充文武常參官救接勅

朕奉太后慈旨以兩司綱運未來百官事力多闕旦夕霜冷深軫所懷令於內庫方圓銀二千一百七十二兩充見任文武常參官救接委御史臺依品秩分俵

停嘉會節勅

三月二十三日嘉會節伏以代行皇帝仙駕上升靈山將卜神既遊於天際節宜輟於人間準故事嘉會節宜停

封屈原勅

楚三閭大夫屈原正直事君文章飾已當椒蘭之是佞俾
蕙蒞之不香顯比干之赤心躡彭咸於綠水雖楚烟荆雨
隨強魄於故鄉而福善禍淫播明靈於巨屏名早流於竹
素功有益於州閭爰表厥封用旌良美宜封爲昭靈侯

誅李彥威等勅

彥威等主典禁兵妄爲扇動既有彰於物論兼亦繫於軍
情謫掾遐方安能塞責宜配充本州長流百姓仍令所在
賜自盡

皇太后冊禮改期勅

據太常禮院奏於十二月內擇日冊太后者朕近奉慈旨以山陵未畢哀感方纏凡百有司且虔充奉吉凶之禮難以並施太后冊禮宜俟山陵畢日庶得橋山攀慕彰盡節於羣臣蘭殿承榮展盛儀於朕志情既獲遂禮實宜之付所司

親送山陵勅

朕祇荷丕圖仰惟先訓方追號弓之痛俯臨同軌之期將展孝思宜親營護皇太后義深鳴鳳情極攀龍亦欲專奉靈輿躬及園陵寢廟冀盡追摧之道用終哀敬之儀其大

行皇帝發引日朕當從皇太后親至陵所宜令中書門下
準此指揮